

Stvaranje novih radnih mjesta je prioritet broj jedan

Stvaranje novih radnih mjesta je pojedinačno najhitniji zadatak sa kojim se suočavaju političari u BiH, rekao je danas visoki predstavnik, Christian Schwarz-Schilling, dodavši da će sposobnost kandidata da dovedu do koristi i realizacije ekonomskih reformi i drugih mjera koje su dio procesa stabilizacije i pridruživanja biti "polje na kome će se dobijati oktobarski izbori".

Visoki predstavnik se obratio na sastanku Ekonomskog koordinacijskog odbora u Sarajevu, tijela koje čine trojica premijera i ministri finansija, te drugi zvaničnici čije nadležnosti uključuju ekonomska pitanja.

"Za mene je ekonomski razvoj ključni prioritet", rekao je visoki predstavnik. "Od dolaska u ovu zemlju, održavam sastanke sa poslovnim ljudima u BiH kako bih našao načina da olakšam privlačenje investicija i stvaranje novih radnih mjesta. Proces stabilizacije i pridruživanja predstavlja nacrt za ekonomsku politiku koji podržava širok spektar stranaka. Pitanje je koji politički lideri mogu taj nacrt pretvoriti u realnost i koliko brzo mogu doći do rezultata".

Visoki predstavnik je urgirao da organi BiH donesu potrebne zakone kojima će osigurati pravnu osnovu za Fiskalno vijeće BiH. "Ne možete imati makro stabilnost ako nemate adekvatnu institucionalnu fiskalnu koordinaciju", naglasio je on, "i ne možete stvoriti desetine hiljada radnih mjesta koje trebate stvoriti ako nemate makro stabilnost. Donošenje zakona koji su potrebni za funkcioniranje Državnog fiskalnog vijeća mora biti prioritet".

On je također uputio poziv organima da ne rasipaju očekivane dodatne prihode od PDV-a. Te prihode treba iskoristiti za

smanjenje radničkih doprinosa i olakšanje izmirenja unutrašnjeg duga, naglasivši da “ako to uradite, bit će lakše privući investicije i stvoriti radna mjesta”.

Visoki predstavnik je također pozvao na donošenje Zakona o platama BiH, kojim će se unaprijediti proces nagrađivanja u državnoj službi na osnovu sposobnosti i rezultata, Zakona o obligacijama BiH, kojim će se unaprijediti poslovno okruženje i pripremiti BiH za konkurentsko učešće u savremenoj globalnoj ekonomiji, te Zakona o lijekovima, kojim će se obezbijediti sigurnost lijekova u BiH. Pored toga, on je naglasio hitnu potrebu centraliziranja bankarske supervizije nad Centralnom bankom. “U oblasti bankarstva, BiH je daleko ispred susjednih zemalja – ali postojanje dva entitetska supervizora nema smisla na jedinstvenom tržištu, i manje su efikasni nego što bi bili kada bi se kombinirali u jednog”, rekao je on.

Visoki predstavnik je izjavio da se “sve ove stvari mogu realizirati prije izbora”.